
Saksnr: 2020/50967-2
Saksbehandlar: Kristin Arnestad
Dato: 19.05.2020

Til: Hovudutval for næring, naturressursar og innovasjon

Frå: Fylkesdirektør for innovasjon og næringsutvikling

Orientering - Kystskogmidlar 2020

Om innhaldet i denne orienteringa

Fylkeskommunen er medlem i Kystskogbruket, eit samarbeid som jobbar for at potensialet i skognæringa langs kysten skal realiserast. I 2020 har fylka som er medlem i Kystskogbruket fått ei ny oppgåve gjennom regionreforma. Det er sett av til saman 6 mill. kr. til Kystskogbruket, såkalla Kystskogmidlar. Vestland har fått 1,38 mill. kr. Fylkeskommunane skal samordne seg slik at midlane, etter søknad, i all hovudsak blir brukt til næringsretta fylkesoverbyggjande prosjekt. I samband med sak om handlingsplan for landbruk i februar i år gjorde hovudutvalet følgjande vedtak:

Fylkesrådmannen får fullmakt til å tildele 1 380 000 kr. sett av til prosjektmidlar til Kystskogbruket. Midlane skal tildelast i samråd med andre fylke og i tråd med forskift for ordninga. Hovudutvalet får lagt fram orienteringar om ordninga, og om skog og treprodukt som næring.

I denne saka orienterer vi kort om Kystskogbruket, og ordninga med Kystskogmidlar. Vi ynskjer også å kome attende med orienteringar om skog, og næringsutvikling basert på tre ved eit seinare høve.

Kort om Kystskogbruket

Kystskogbruket er ei samarbeidsform og arbeidsmetodikk, der skog- og trenæringa i kystfylka jobbar aktivt saman med fylkespolitisk - og administrativt nivå, med støtte frå faginstansen på landbruksnæring hjå Fylkesmannen. Alle kystfylka frå Finnmark i nord til Agder i sør er med i Kystskogbruket. Målet til Kystskogbruket er å firedoble verdiskapinga gjennom at potensialet i skogbruket langs kysten blir realisert innan 2040.

Kystskogbruket jobbar innan tre område: politikk, næring og forvaltning. Både Sogn og Fjordane fylkeskommune og Hordaland fylkeskommune har tatt del i, og støtta Kystskogbruket økonomisk i mange år. Erlend Haugen Herstad er Vestland sin representant i Fylkeskommunalt oppfølgingsprogram. I tillegg møter fylkeskommunen med administrativ representant, og fylkesmannen deltek i fylkesmannsgruppa. Skognæringsforum Vestland er medlem i Skognæringa Kyst.

Kystskogbruksmeldinga er det felles strategidokumentet for medlemsfylka, og meldinga er politisk handsama i fylka. Meldinga blei rullert i 2015, og inneverande prosjektperiode går ut 2020. Styringsgruppa for fylkeskommunalt oppfølgingsprogram har gjort vedtak om at det er ynskjeleg med ei rullering av meldinga i løpet av 2020. Dette er ei sak vi vil kome attende til.

Meir informasjon om Kystskogbruket her: <https://kystskogbruket.no/>

Ordninga med Kystskogmidlar

Kystskogmidlane har dei seinare åra blitt forvalta av Landbruksdirektoratet, med bakgrunn i eit budsjett som er drøfta med eit felles fylkesmannsfora. I 2020 er det samla sett av 6 mill. kr. til Kystskogbruket over Jordbruksavtalen, Landbrukets utviklingsfond, kapittel 1150, post 50. Det er følgjande fordeling mellom fylka:

Fylkeskommune	Kystskogmidlar
Agder	Kr 180 000
Møre og Romsdal	Kr 720 000
Nordland	Kr 720 000
Rogaland	Kr 480 000
Troms og Finnmark	Kr 720 000
Trøndelag	Kr 1 800 000
Vestland	Kr 1 380 000
Samlet løyving	Kr 6 000 000

I følge oppdragsbrevet til fylkeskommunane frå Landbruks- og matdepartementet i 2020, skal fylkeskommunane samordne seg slik at midlane, etter søknad, i all hovudsak blir brukt til næringsretta fylkesoverbyggjande prosjekt. Ved tildeling av midlane skal fylkeskommunane legge vekt på å bygge vidare på det arbeidet som er gjort i Kystskogbruket. Midlane kan ikkje nyttast til prosjekt i regi av fylkeskommunen. Det var lite informasjon om ordninga i oppdragsbrevet frå departementet, og det var heller ikkje informert om ordninga før overtaking av ansvaret, og ein kom difor litt seint i gang.

I praksis har midlane tidlegare blitt tildelt Skognæringa Kyst som er «næringsdelen» i Kystskogbruket. Skognæringa Kyst er eit samvirkeføretak, som skal arbeide for å synleggjere og løyse næringspolitiske spørsmål som er felles for næringsaktørar frå hele verdikjeda i kystskogfylka.

Administrasjonen i alle fylkeskommunane i Kystskogbruket har drøfta ordninga, og laga felles retningsliner og praksis for handsaming for ordninga. Sidan vi no er langt ut på året, og det har vore ein tydeleg praksis frå føregåande år har vi lagt vekt på ei mest mogleg effektiv handsaming. Fylka har drøfta søknaden og vil overføre sine midlar Trøndelag fylkeskommune som skriv eit felles tilskotsbrev på vegne av fylka, og handterer utbetaling og rapportering.

Tildeling til Skognæringa Kyst i 2020

Skognæringa Kyst har hatt ein aktiv innsats opp mot avtalepartane i Jordbruksforhandlingane, noko som truleg har vore avgjerande for at det har blitt sett av midlar.

Administrasjonen i fylka har vurdert søknaden, og er einige om ei felles innstilling. Nokon, som Vestland har administrativ fullmakt, andre tek saka til politisk handsaming. Fylkesrådmannen tildeler Vestland si ramme på 1 380 000 kr. til søknaden frå Skognæringa Kyst, dette skal gå saman med til saman 6 000 000 kr. frå alle fylka i Kystskogbruket i eit felles tilskot. Arbeidet er i stor grad pågåande, og det skjer mykje godt arbeid, mellom anna knytt til infrastruktur. Her kan vi mellom anna nemne Kvamen Tømmerkai i Fjaler som blei opna i mars, her har Kystskogbruket jobba godt fram mot realisering av prosjektet.

Midlane til Skognæringa Kyst i 2020 skal nyttast slik:

	Beløp
1. <u>Infrastrukturprogrammet</u> (oppfølging) Kystskogbrukssamarbeidet har sidan oppstarten prioritert arbeidet med å betre infrastrukturen i skogbruket, sidan 2009 med engasjert prosjektleiar.	1 200 000

	Ein hovudaktivitet i 2020 vil være å realisere ei satsing retta mot flaskehalsar på kommunevegnettet, finansiert med statlege midlar etter modell frå satsinga på tømmerkaier (jf. tema 7. FoU).	
2.	<u>Omdømmebygging og nettverksarbeid (oppfølging)</u> Skogen si rolle for å kunne nå klimamåla blir stadig viktigare. Gjennom Kystskogbruket er arbeidet målretta med å kommunisere dette ut til storsamfunnet. Det same gjelder skognæringa sine moglegheiter og potensial for verdiskaping i samband med en grøn omstilling av norsk økonomi.	700 000
3.	<u>FoU, Innovasjon og trebruk (oppfølging)</u> Skogbruket er ei viktig næring i utviklinga av bioøkonomien og i omstillinga til et grønare samfunn. Det er et stort potensial knytt til nye bruksområde av skogråstoffet, utvikla gjennom innovasjon og FoU med klimaet som drivande kraft.	1 000 000
4.	<u>Skog og klima, klimaskog (oppfølging)</u> Skogen er ein verdifull ressurs som gir verdiskaping gjennom foredling av trevirke, og som råstoff for ei rekke klima- og miljøvenlege produkt. Den gir eit positivt klimabidrag gjennom opptak av CO2 gjennom fotosyntesen, og lagring av karbon i biomasse, jordsmonn og treprodukt. I tillegg bidrar produkt av tre til å redusere bruken av energi og material med større klimabelastning.	1 200 000
5.	<u>Oppfølging av Kystskogmeldinga (oppfølging)</u> <i>Melding om Kystskogbruket 2015</i> er fundamentet for trepartssamarbeidet. Skognæringa Kyst har med utgangspunkt i meldinga, som eit grunnlag for prioritering av arbeid og oppgåver, utarbeida eit strategidokument for perioden 2017 - 2021. Hovudfokus i 2020 vil framleis vere oppfølging av strategiplanen gjennom konkretisering og forankring av tiltak.	200 000
6.	<u>Fellestiltak i regi av fylkesmanns- gruppa</u> <i>Hogsttidspunkt - Konsekvenser for skogeiers økonomi og skogens klimaeffekt</i> - Utvikling av eit verktøy og informasjon (retteleiar) som skal gje skogeigar betre føresetnader for å vurdere tiltak i eigen skog. Dette for å sikre best mogleg økonomisk resultat, samt auke kunnskap og interesse for aktiv forvaltning av eiendommene.	500 000
7.	<u>FoU, nye prosjekter som skal realiserast i 2020</u> <ul style="list-style-type: none"> • <i>Betre infrastruktur i vanskeleg terreng (forprosjekt)</i> <ul style="list-style-type: none"> - Identifisere utfordringar og konkretisere tiltak for auka aktivitet i vanskeleg terreng (kr 300 000) • <i>Kartlegging av kommunale flaskehalsar som er viktig for tømmertransporten</i> <ul style="list-style-type: none"> - Utarbeiding av ei analyse av kommunevegnettet i samtlege kystskogfylker. Denne vil være et sentralt reiskap for å kunne gjennomføre tiltak med statlege midlar på line med tidlegare arbeid med tømmerkaier (kr 700 000) 	1 200 000
	Totalt	6 000 000

Kystskogbruket og kystskogmidlar i tida framover

Ordninga i 2020 blei spesiell, sidan ein overtok ein etablert praksis frå Landbruksdirektoratet og mykje av arbeidet det blir søkt støtte til, allereie er i gang. Den administrative gruppa som har jobba med dette har difor sagt at ein vil sjå på ordninga igjen hausten 2020, for å sjå om det er ynskjeleg med justeringar i god tid før arbeidet startar i 2021.

Erfaringane med Kystskogbruket viser at samarbeidet har bidratt til resultat utover det fylka kunne oppnådd ved å stå kvar for seg. Dette blir synleggjort mellom anna ved at det blir sett av statlege kystskogmidlar og at det er blitt realisert fleire større infrastruktursatsingar, mellom anna knytt til tømmerkaier.

Kystskogmidlane er viktige for næringa, og det bør jobbast aktivt for at ordninga blir vidareført. Dette kan mellom anna gjerast gjennom fylkeskommunen sitt innspel til jordbruksforhandlingane.

For Vestland sin del bør vi jobbe meir med å trekke det arbeidet og erfaringane i Kystskogbruket ned på eit regionalt nivå i Vestland, slik at næringa i Vestland får enno betre nytte av arbeidet i det nasjonale samarbeidet. I løpet av 2020 startar truleg arbeidet med ei rullering av Kystskogmeldinga.